

馮輝岳

## 春神个手指

客語

春神个手指點一下，  
開了！開了！  
一蕊兩蕊三蕊油桐花；  
春神个手指點一下，  
開了！開了！  
四蕊五蕊六蕊油桐花；  
春神个手指點一下，  
開了！開了！  
十蕊百蕊千蕊油桐花。  
春神行過山排，  
春神行過庄下，  
一路嘻嘻哈哈嘻嘻哈哈！

# 大目珠

客語

有一雙大目珠，  
大目珠，好看書。  
有一雙大目珠，  
看近看遠都清楚。  
有一雙大目珠，  
圓圓烏烏，  
又靚又利，  
愛好好來保護。



# 蛞蝓

客語

蛞蝓分人請，  
屋仔背等行，  
緊行緊問：  
到吉？到吉？  
蛞蝓分人請，  
行到樹尾頂，  
大家食飽走淨淨。

馮輝岳



鏡仔


客語

企到鏡仔前，  
看嘴角个酒窟，  
係深抑係淺？  
企到鏡仔前，  
看兩粒目珠，  
係毋係大又圓？  
企到鏡仔前，  
輕輕揸圓圈，  
看毛辮个蝶仔，  
係無係想愛飛上天？

# 屋簷鳥仔

客語

噠噠噠噠噠噠噠噠，  
屋簷鳥仔好唱歌，  
電線頂高排排企，  
你一句， 你一句，  
唱出歡喜同傷悲。  
噠噠噠噠噠噠噠噠，  
屋簷鳥仔好講話，  
講南講北講東西，  
你一句， 你一句，  
看到人來碰碰飛。



馮輝岳

# 機器人

客語

機器人，盡聰明，  
會唱歌，會講話。  
機器人，當勇敢，  
上山下海都毋怕，  
機器人，盡聽話，  
喊佢亢起就亢起，  
喊佢坐下就坐下。

# 麼儕

客語

麼儕跳舞？

麼儕打鼓？

麼儕做阿丑？

蝶仔跳舞，

蝦蟆打鼓，

猴仔做阿丑。

麼儕剁雞臂？

麼儕炒木耳？

麼儕喊肚飢？

阿姆剁雞臂，

阿姊炒木耳，

吾老弟喊肚飢。